



Vilhelmus ex nobili familia Masbachiorum apud Vuirtenbergicos natus, & in omni genere uirtutum educatus est. Is à pueris operam literis dedit, & earum sibi mediocrem usum comparauit. Postea quoq; militaribus studijs & rebus politicis adeò exercitatus fuit, ut passim in magna existimatione esset. Id cum prudentissimus princeps Vuirtenbergensis Huldricus cognouisset, eum inter consiliarios admisit, & res magnas hinc inde in comitijs Imperij suo nomine expedire iussit. quæ etiam ille diligenter pro sua prudentia præstitit. Itaq; cum 1545 Carolus Imperator Spiram uenisset, atq; uicinos principes, cum Philippo Lädgrauiio, & Friderico Palatino ad se uocasset, Vuilhelmus quoq; à suo principe eò missus fuit. In eo loco Masbachius multa cum Granuellano & Nauio egit, atque etiam in præsentia reliquorum principum coram Cesare de rebus Imperij prudenter differuit, ita ut alij eius facūdiam, & in sermone grauitatem admirarentur. Postea quoq; in bello Smalkaldico suam stationem egregie defendit, & tandem à suo principe iussus, arcem creditam hosti concessit, ut in ea regione pax recuperaretur. Itaq; factum ut Vuilhelmus ob multarum rerum usum, atq; magnam corporis & animi fortitudinem passim conspicuus fuerit. Sleid.